

## Sportello lingua sarda

### Isportellu de lingua sarda

In su mesi de friaxu 2012 in su Comunu de Bàini at torrau at aberri s'isportellu linguìsticu comunali chi nascit gràtzias a sa Lei Regionali n. 26 de su 1997 e, pruscatotu, a sa Lei 15 de nadali de su 1999 n. 482 (chi est cussa chi donat su dinai po ddu aprontai e ddu fai traballai). Custas duas leis ant arreconnotu sa lingua sarda comenti a espressioni de s'identidadi culturali de sa Sardìnnia, donendiddi sa pròpriu dinnidadi de sa lingua italiana.

Custu ufitziu comunali, impari cun s'Ufitziu linguìsticu provinciali, depit contivigiari totu is fainas chi punnant a afortiai su manìgiu de sa lingua sarda in sa comunidadi linguistica bàini e primu de totu:

- essi liòngiu intra de s'Amministratzioni comunali e s'Ufitziu de sa lingua sarda de sa Provincia de Aristanis;
- trabballai a cuncòrdia cun s'Ufitziu de sa lingua sarda de sa Provincia de Aristanis po tutu is fainas chi pertocant su manìgiu de sa lingua in ònnia cuntestu de sa vida pùblica e privada de sa comunidadi;
- aperri su Servìtziu de isportellu linguìsticu, chi at a tenni s'incuru de fai furriaduras, interpretariau, de giai informatziones e de ispainai materiali a ufitzius e cidadinus;
- agiudai a ispainai materialis iscritus de is atrus ufitzius de sa lingua sarda de sa provincia de Aristanis, comenti a sinnaletica, avisus e atru materiali de informatziones;
- fai atividadis impari a bibliòtecas e atrus ufitzius comunalis po arribai a torrai a bogai a pillu su costumu po mannus e pipius, mammas, babbus e piciocheddus, a ligi, fueddai, iscriri sa lingua sarda in calisiat chistioni.
- aprontai totu su materiali linguìsticu chi non si ndi podit fai de mancu po assegurai s'impreu de su sardu me in is trabballus de is ufitzius, in su Contzillu comunali, me in is Assessoraus e me in is entis de foras;
- fai in manera, po mesu de s'apariciu de cursus de aggiornamentu, chi su personali de s'Enti e is atrus sugetus chi tenint interessu potzant manigiai, in su fueddai e s'iscriri insoru, sa lingua sarda aintru de s'Enti etotu e me in is raportus cun su pùblicu.

Difati est fintzas beru chi, mancai su sardu siat ispainau in totu sa Sardìnnia (francu in Gaddura, in Sàssari e me is biddas acanta, in s'Alighera e in Carluforti e Calaseta), nc'est s'arriscu siat chi s'ammesturit cun is atras linguas (impoberendi sa calidadi linguistica) o siat de essi abandonau po arrexonis culturalis, sotzialis o econòmicas (arredusendisì su nùmeru de is fueddadoris).

Sa de sa lingua sarda, duncas, no est una chistioni linguistica e sotziolinguistica isceti, ma fintzas unu problema politicu e culturali. Difatis, sa lingua est su principiù de s'unidadi e de s'identidadi de totu is sardus. Duncas, su de lassai isperdi sa lingua sarda, chi est su fundamentu de s'identidadi culturali de sa comunidadi de Sardìnnia, est oi unu perìgulu chi

depeus circai de istesiai, cun su pistighingiu de chini cumprendit ca seus arrischendi de perdi una parti manna de nosu etotu.

Po circai de arresolvi custus problemas nc'est abisòngiu de fai una politica linguistica pretzisa e de importu mannu e duncas apariciai e sighiri unu progetu chi pertochit totu is comunidadi e innui totus si ddui potzant arreconnosci: entis, comunus e, pruscatotu, sa genti, is fueddadoris chi cussus entis rapresentant.

Po afortiai su processu de defensa, promotzioni e avaloramentu de sa l'ingua abisòngiat chi is fainas lompan non a calincunu cambu de sa sotziedadi isceti, cunsiderau mancai comentis a su prus debili po sa l'ingua, ma depint pertocai totu e totus, est a nai fueddadoris, famillias e istituzionis.

Custa est sa punna de su progetu "*Lingua sarda: lingua de s'identidadi, lingua de su mundu*" chi su Comunu de Bàini impari a is comunus de Bobadri, Baressa, Ollasta, Pau, Abas e Sini ant bofidu inghitzai: fai educatzioni linguistica chi siat bella e chi lompat a totu is setoris de sa vida pùblica e privada de sa comunidadi.

Po cussu est pretzisu su de fai intrai sa l'ingua sarda in calisiat logu, incummentzendi de sa Pùblica Amministratzioni. Serbit un'atzioni de visibidadi de su sardu a tenori de is abisòngius de comunicatzioni de sa vida de oi e una politica linguistica chi siat acanta de su territòriu e de sa genti. E custas funt is arrexonis chi ant portau su Comunu de Bàini impari a is comunus de Bobadri, Baressa, Ollasta, Pau, Abas e Sini a domandai su dinai a su Ministeru po nd'istrantaxai su Servitziu linguisticu territoriali, chi at a trabballai paris cun is Servitzius linguisticus de is atrus comunus asuta de sa ghia de s'Ufitziu de sa l'ingua e de sa cultura sarda de sa Provìncia de Aristanis e de cussu de sa Regioni Sarda.

Su Servitziu linguisticu est a dispositzioni de citadinus, maistus de iscola, professoris e istudentis po cali si siat informatzioni, profundamentu, duda, crosidadi, bibliografia, sitografia asuba de sa l'ingua sarda, po consulèntzias didàticas e po contzillus chi pertocant is arrègulas de iscradura de su sardu.

S'operadora est sa dotora Tatiana Frau  
S'isportellu aperit:

<b>Dii</b>	<b>de</b>	<b>a</b>
Sa giòbia	7.30	12.30
	7.30	9.30

Telèfunu: 0783.930049